

四庫全書

集部

欽定四庫全書

集部
祖徠集卷三

詳校官給事中臣李臺

檢討臣何思鈞覆勘

總校官編修臣王燕緒

校對官編修臣盧遂

謄錄監生臣陶鳴珂

欽定四庫全書

集部三

徂徠集

別集類二 宋

提要

臣等謹案徂徠集二十卷宋石介撰介字守道兗州奉符人天聖八年進士及第初授嘉州判官後以直集賢院出通判濮州事迹具宋史本傳初介嘗躬耕徂徠山下人以徂徠先生稱之因以名集介深惡五季以後文格

卑靡故集中亟推柳開之功而復作怪說以排楊億其文章宗旨可以想見雖主持太過抑揚皆不得其平要亦憂然自異者王士禎池北偶談稱其倔強勁質有唐人風較勝柳穆二家而終未脫草昧之氣亦篤論也歐陽修作介墓誌稱所為文章曰某集者若干卷又曰某集者若干卷凡重言之似原集當分為二部此本統名徂徠集殆後人所合編歟

第四卷內寄元均叔仁讀易堂永軒暫憩四
詩有錄無書則傳寫脫佚亦非盡其舊矣介
傳孫復之學毅然以天下是非為己任然客
氣太深名心太重不免流於詭激王偁東都
事畧記仁宗時罷呂夷簡夏竦而進章得象
晏殊賈昌朝杜衍范仲淹韓琦富弼王素歐
陽修余靖諸人介時為國子直講因作慶厯
聖德詩以褒貶忠佞其詩今載集中蓋仿韓

愈元和聖德詩體然唐憲宗削平淮蔡功在社稷愈仿雅頌以紀功是其職也至於賢姦黜陟權在朝廷非儒官所應議且其人見在非蓋棺論定之時迹涉嫌疑尤不當播諸簡牘以招恩怨厥後歐陽修司馬光朋黨之禍屢興蘇軾黃庭堅文字之獄迭起實介有以先導其波又若太學諸生挾持朝局北宋之末或至於鬻割中使南宋之末或至於驅逐

宰執由來者漸亦介有以倡之史稱孫復見
詩有子禍始此之語是猶為一人言之未及
慮其大且遠者也雖當時以此詩得名而其
事實不可以訓故仍舊本存之而附論其失
如右乾隆四十五年五月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

祖徠集卷一

宋 石介 撰

頌

宋頌九首

并序

詩序曰頌者美盛德之形容以其成功告於神明者也夫有盛德大業然後著之於文辭有粹文俊辭然後見之乎功業德與辭表裏功與文相等然後奮為文藻摘為英聲昭為烈光晔晔煜煜如日

之華鏗鏘訇訇如雷之行暢於無前揚於無上江
浸海流天高地厚靡有窮盡若周之文武興起王
業公旦制作禮樂成康積隆太平宣王繼起中興
其功偉歟漢之高祖定禍亂文景尚恭儉孝武却
攘戎狄光武恢復先業其功偉歟唐之太宗誅李
密王世充竇建德薛舉輔公祐明皇除太平公主
相姚宋開元三十年昇平憲宗斬楊惠琳劉闢吳
元濟復諸侯地數千里其功偉歟我國家太祖武

皇帝一駕而下澤潞再矢而定維揚三揖而納荆
潭四指而收蜀廣五征而平江南太宗文皇帝克紹
前烈亦既郊祈南致淮海數十州之地纔謀順動
北縛并元四十五年之寇真宗章皇帝暫臨澶淵
匈奴喪威墮膽迄今四十年樂我盟好不敢箠馬
而南今皇帝在明道之初獨臨軒墀躬厥庶政神
謀睿斷如雷之動六合莫不震焉發號施令如
風之行萬民莫不仰焉登任括俊剪鉏姦惡天清

地明日燭月霽其功也如此鴻烈景鑠乃可作為
歌詩雅頌流於金石被於管絃報天地而奏宗廟
感昆蟲而和夷貊矣故周有清廟生民臣工天作
雖潛勺武漢有中和樂職聖主得賢臣唐有晉陽
武獸之窮涇水黃奔鯨沛淮夷方城元和聖德諸
篇臣介竊擬前人輒取太祖太宗真宗陛下功德
之尤著見者為宋頌九篇臣雖齒髮堅壯未為衰
老自視材智甚短施之於事無毫髮之長虛生盛

明之時真以為媿然文采晦昧體格卑隘不足以
稱述四聖君之耿光亦庶乎萬一有以開太平之
頌聲云

皇祖

太祖皇帝初用師澤潞誅李筠伐揚州滅李重進
也

皇祖神武疇敢作靈元年四月筠叛於潞皇祖躍馬至
潞城下筠伏其辜擴清中夏皇祖龍驤疇敢猖狂元年

九月進叛於揚皇祖揮戈至揚城隅進窮金樓并焚其
孥惟我皇祖端拱垂旒應天順人實代有周罔有不
同天時人謀四海陶鈞涵濡養撫罔有失所大德其
裕筠胡敢違進胡不隨予匪汝誅汝自取之既剪二盜
聖武彌耀荆潭蜀吳如拔腐草

皇祖六章二章八句一章六句三章四句

聖神

太祖皇帝出師援長沙且假道遂取荆潭也

不疾而速不怒而威惟聖惟神其幾其微二國之君各
保爾土虎憑於山莫予敢取蛟憑於淵莫予敢侮萬斯
年兮闢鎬以固聖機神謀天祕地藏風行雷動旦秣我
馬夕取其疆二君不知晏眠于床具篙與舟同朝天子
一發五犯二君皆至皇祖聖神鴻光丕懿

聖神四章一章四句一章八句一章七句一章
六句

湯湯

太祖皇帝收蜀取孟昶也

湯湯其江區區爾孟一夫當關不知天命蟻固于穴蛙
負于井咫尺之地為可以騁彼以險守我以德懷王師東
來函谷自開蜀虜授首呼號哀哀蜀人鼓舞與我偕來
首時蜀道絕人來往今蜀既平王道蕩蕩尉候一至朝貢
相望魏魏皇祖德聲遠暢

湯湯三章章八句

莫醜

太祖皇帝用周渭之策命潘美取廣州也

莫醜匪虺莫悍匪兇有銀在南毒螫不已沸湯熱火暴
我赤子皇祖曰吁天生蒸民搃之君長以養以仁乃予
不恤匪銀之器乃謀于渭乃將于美王師鷹揚涉江萬
里闢其城門銀號請死皇祖有德乾覆坤容予在弔民
不殺以封皇祖慈仁感於昆蟲

莫醜四章章六句

金陵

太祖皇帝命師取李煜也

金陵峨峨長江萬里誰為巢穴養此蛇豕天豈作限而險而恃不順不臣敢亢天子帝赫斯怒王師除驅蕞爾螻蟻豈勝誅鉏哀哀窮俘爰叫以呼歸于京師燁哉聖謨

金陵二章章八句

聖文

錢俶以吳越歸也

聖文安安聖武桓桓朝貢萬里正朔百蠻無吳之險無
蜀之艱無潭之噐無荆之頑咸予賓順悅色和顏彼叡
在杭有地千里皮毀毛落孤睽莫恃懾服聲教慕為臣
使携彼人民挈其土地于橐于囊歸于天子天子神聖
罔不懷柔既懷而封恩涵澤流逆予有刑視彼揚州順
予有封視此錢侯赫赫宋德有何窮休

聖文三章章十句

六合雷聲

太祖皇帝親征太原取劉繼元也

六合雷聲中國有君塗其耳目不使聽聞隔在荒外嗟
爾并人匪民之罵為賊俘虜往弔其民王澤時雨往伐
其罪王師虎旅昔時錢俶有國於吳今俶歸我為吾前
驅并人望風請為臣奴舊是匈奴為并左臂今附有德
不與賊子并人失恃求就戮死撫我則懷并人肯來降
旗出城并門夜開并土既平吾王休哉往在藝祖未遑
拓寓遺我聖祖啟此北土取告太廟於皇孝武

六合雷聲六章章六句

聖武

敵犯我疆至於澶淵真宗皇帝親臨六師射殺敵
酋軍不得歸乞盟請和也

聖武惟揚鷹師虎旅至于澶淵執彼醜虜醜虜之來蜂
蟻敢怒我師如律不怒以懼既俘其帥請示死所聖仁
如天惡殺好生于以耀德匪來觀兵亟命止戈無茲黷
刑不勦其類戴我以兄屈膝請和畏我威靈棄甲以歸

處彼北隩千斯年兮永以為好邊人其安養幼送老民
有肥田馬有茂草威德遠兮思我聖考

聖武三章章十句

明道

莊獻明肅皇太后崩今皇帝陛下獨臨軒墀聽決
萬幾睿謀聖政赫然日新也

明肅惟母定勤養撫有臣有虎有離有附請王祿產請
廟考祖古人有之規呂矩武政在房帷小人乘時十年

于茲惟幾惟微聖仁如天不識不知龍晦其威神藏其
為明道四月睿德明發帝褰簾箔出臨軒榻搃攬萬幾
指揮六合聖人之興雷動乾行進退大臣顏色和平誅
逐羣豎左右不驚不怒不威不疾而速百蠻偷息百官
整肅土無二主惟辟作福圖任哲又拔崇賢能旌責忠
臣死生光榮洗刷敝風宮闕清明惟帝之道與時而默靜則
坤闔動則乾闢十年深宮不有其權今日南面退姦進賢宋
承大統八十年矣明道之政獨為粹美唐三百年時惟開元

猗歟明道開元同年明道之政可以歌舞小臣作頌實慚吉甫

明道十一章二章八句四章六句五章四句

慶厯聖德頌

并序

三月二十一日大昕皇帝御紫宸殿朝百官相得
象殊拜竦樞密使夷簡以司徒歸第二十二日制
命昌朝參知政事弼樞密副使二十六日勅除修
靖素並充諫官四月八日皇帝御紫宸殿朝百官
拜衍樞密使仲淹琦樞密副使乃用御史中丞拱

辰御史邈御史平諫官修靖十一疏追竦樞密使
勅十三日勅又除襄為諫官天地人神昆蟲草木
無不歡喜皇帝退姦進賢發於至聰動於至誠奮
於睿斷見於剛克陟黜之明賞罰之公也上視漢
魏隋唐五代凡千五百年其間非無聖神之主盛
明之時未有如此選人之精得人之多進人之速
用人之盡實為希濶殊尤曠絕盛事在皇帝之德
之功為卓犖瑰偉神明魁大古者一雲氣之祥一

草木之異一蹄角之怪一羽毛之瑞當時羣臣猶
且濃墨大字金頭鈿軸以稱述頌美時君功德以
為無前之休丕天之績如仲淹弼寔為不世出之
賢求之於古堯則夔龍舜則稷契周則閼散漢則
蕭曹唐則房魏陛下有之諸臣亦幸今天下之人
望為宰相諫官者陛下盡用之此比雲氣草木蹄
角羽毛之異萬萬不侔豈可翻無歌詩雅頌以播
吾君之休聲烈光神功聖德刻於琬琰流於金石

告於天地奏於宗廟存於億萬千年而無窮盡哉
臣竇羞之臣嘗愛慕唐大儒韓愈為博士日作元
和聖德頌千二百言使憲宗功德赫奕煒燁昭于
千古至今觀之如在當日陛下今日功德無讓憲
宗臣文學雖不逮韓愈而亦官於太學領博士職
歌詩讚頌乃其職業竊擬於愈輒作慶厯聖德頌
一首四言凡九百六十字文辭鄙俚固不足以發
揚臣子之心亦欲使陛下功德赫奕煒燁昭于千

古萬千年後觀之如在今日也臣不勝死罪臣賤
無路以進姑藏諸家以待樂府之采焉

於維慶厯三年三月皇帝龍興徐出闔閭晨坐太極晝
開闔闔躬攬賢英手鋤姦枿大聲泚泚震搖六合如乾
之動如雷之發昆蟲螭蠋妖怪藏滅同明道初天地嘉
吉初聞皇帝感然言曰予父予祖付予大業予恐失墜
實賴輔弼汝得象殊重慎徽密君相予久予喜君伐君
仍相予笙鏞斯協昌朝儒者問學該洽與予論政傳以

經術汝貳二相庶績咸秩惟汝仲淹汝誠予察太后乘
勢湯沸大熱汝時小臣危言業業為予司諫正予門闥
為予京兆聖予讒說賊叛于夏往予式遏六月酷日大
冬積雪汝暑汝寒同於士卒予聞心酸汝不告乏予晚
得弼予心弼悅弼每見予無有私謁以道輔予弼言深
切予不堯舜弼自咎罰諫官一年奏疏滿篋侍從周歲
忠力盡竭契丹亡義禱杙饕餮敢侮大國其辭慢悖弼
將予命不畏不懾卒復舊好民得食褐沙磧萬里死生

一節視弼之膚霜剥風裂觀弼之心鍊金鍛鐵寵名大
官以耐勞渴弼辭不受其志莫奪惟仲淹弼一夔一契
天實賚予予豈敢忽並來弼予民無瘥札曰行汝來汝
實黃髮事予二紀毛禿齒豁心如一分率履弗越遂長
樞府兵政毋蹶予早識琦琦有奇骨其器魁礪宣視居
楔其人渾樸不施剗剗可屬大事敦厚如勃琦汝副行
知人予括惟修惟靖立朝讞讞言論礪礪忠誠特達祿
微身賤其志不怯嘗詆大臣亟遭貶黜萬里歸來剛氣

不折屢進真言以補予闕素相之後含忠履潔昔為御史幾叩予榻至今諫疏在予箱匣裏雖小臣名聞予徹亦嘗獻言箴予之失剛守粹慤與修儔匹並為諫官正色在列予過汝言無鉗汝舌皇帝聖明忠邪辨別舉擢俊良掃除妖魃衆賢之進如茅斯拔大姦之去如距斯脫上倚輔弼司予調燮下賴諫諍維予紀法左右正人無有邪孽予望太平日不逾浹皇帝嗣位二十二年神武不殺其默如淵聖人不測其動以天賞罰在予不失

其權恭已南面退姦進賢知賢不易非明不得去邪惟
難惟斷乃克明則不貳斷則不惑既明且斷惟皇之德
羣下踧踖重足屏息交相告語曰惟正直毋作側僻皇
帝汝殛諸侯危慄墮玉失舄交相告語皇帝神明四時
朝覲謹修臣職四夷走馬墜鎧遺策交相告語皇帝神
武解兵修貢永為屬國皇帝一舉羣臣懾焉諸侯畏焉
四夷服焉臣願陛下壽萬千年

徂徠集卷一

欽定四庫全書

徂徠集卷二

宋 石介 撰

古詩

汴渠

隋帝荒宴遊厚地剗為溝萬舸東南行四海困橫流義
旗舉晉陽揚帆入揚州揚州竟不返京邑為墟丘吁哉
汴渠水至今病不瘳世言汴水利我為汴水憂利害吾
豈知吾試言其由汴水濬且長汴流湍且道千里泄地

氣萬世勞人謀舳艫相屬進餽運曾無休一人奉口腹
百姓竭膏油民力輸公家斗粟不敢收州侯共王都戶
租不敢留太倉粟峨峨冗兵食無羞上林錢朽貫樂官
求要優吾欲塞汴水吾欲壞官舟請君簡賜予請君節
征求王畿方千里邦國足用周盡省轉運使重奉富民
侯天下無移粟一州食一州

麥熟有感

去年經春頻肆赦拜赦人忙走如馬五月不雨麥苗死

赦頻不能活窮寡今年經春無赦書十日一雨及時下
五月麥熟人民飽一麥勝如四度赦吾願吾君與吾相
調和陰陽活元化陰陽無愆元氣活風雨調順苗多稼
使麥長熟人不飢敢告吾君不須赦

讀詔書

丁亥中作

關中有山生虎狼虎狼性越不可當去歲食人十有一
無辜被此惡物傷守臣具事奏聖帝聖帝讀之惻上意
乃詔天下捕虎狼意欲斯民無枉死吾君仁覆如天地

只知虎狼有牙齒害人不獨在虎狼臣請勿捕捕貪吏
待士熙道未至

鳳凰饑憶玉山禾鼓翅飛下玉山阿玉山之禾粒未熟
饑不得食心如何麒麟渴憶崑山流軒軒直下崑山幽
崑山之流流未長渴不得飲予心愁

赴任嘉州嘉陵江泛舟

中心橫大江兩面疊青嶂江山相夾間何人事吟放半
樽岼憤坐永日揚舲望孤棹已夷猶數峰更清向危影

倒波流凝光浮水上白鷺答猿啼樵歌應漁唱併生泉
石心堪愧庸俗狀江清照人寒江面平如掌有客去逍
遙扁舟浮蕩漾遠與城市絕深將泉石向水鳥忽東西
溪雲時下上軒冕誰富貴琴樽自閒放酒色照綠波吟
聲入秋浪五湖何范蠡磻溪無呂望吾家徂徠下波水
有清漲常時夜雨急隨雨來枕上魂魄寒無寐山居得
真尚一為塵纓縛不得聞時向兩耳聒欲聾喧囂千萬
狀夜雨自潺湲窮途空悲愴劔南四千里地遐接蠻瘴

乍聽江水聲聊使心夷暢

三豪詩送杜默師雄

并序

本朝八十年文人為多若老師宿學不敢論數近
世作者石曼卿之詩歐陽永叔之文辭杜師雄之
歌篇豪於一代矣師雄學於予辭歸作三豪詩以
送之

曼卿豪於詩社壇高數層永叔豪於辭舉世絕儔朋師
雄歌亦豪三人宜同稱曼卿汨沒餘老死殿中丞人雖

埋黃泉詩名長如冰永叔亦連蹇病鸞方竊騰四海讓
獨步三館最後登師雄二十二筆距犂如鷹才格自天
來辭華非學能迴顧李賀輩麤俗良可憎玉川月蝕詩
猶欲相憑凌曼卿苟不死其才堪股肱永叔器甚宏用
之王道興師雄子勉旃勿便生驕矜

南山贈胡明復先生

我來南山興感悲萬物絃絃宰者誰衆材叢卑無竒姿
直棘曲輪皆所宜大木磊磊節幹竒撐岩柱谷無處施

我願天子修明堂坐朝諸侯會四夷柱要十圍棟百尺
日責匠石搜訪之千人用斧萬人拽大根砍斷山崩歆
五郡追牛十縣丁載送上都天子怡般輸駭汗工倭走
有目未有曾觀窺黃帝合宮堯衢室周制九筵虞總期
聽政朝夕有攸處閨門左右咸以宜天子拱手四輔立
坐致四海為雍熙不用直棄用即大短轅曲輪爾胡為

河決

乙亥中作

崑崙山最大峨峨橫絕域黃河地下來洶洶不可測河

伯一發怒擘開崑崙石水出東北陬浩渺無涯極平地
水行疾九州如咫尺湯湯勢滔天黎元多沉溺上貽堯
心憂四岳舉鯀塞鯀用汨彞倫九載無成績堯怒不能
治遂行羽山殛有子其曰禹命使嗣父職洛中得龜書
九疇文甲拆禹乃乘四載周遊視水迹百川各復道九
河皆開闢禹功既已成水患方滋息竊思夫禹意河九
為遠策况云殺其溢聞之孔安國三代逾千年所以無
災厄戰國爭土疆諸侯用詐力遷徙無常歲湮淪不可

識隄障遏水勢溝渠絕地脉禹道不復究河流有壅隔
頻為中國患中國不安席從官徒負薪河伯弗受辭欲
盡淇園竹安救瓠子役民力殫將竭國財耗亦劇四方
競上疏羣臣爭籌畫田蚡方為相書來多持扼豈顧天
下利惟以私田惜賈誼不為用延年亦見斥如何聖人
功千載復不得皇宋運熙泰四聖崇道德百蠻皆臣順
萬物遂生殖八十餘年間人不聞金革惟茲澶滑郡河
患亦云亟常記天禧中山東與河北藁秸賦不充遂及

兩京側騷然半海內人心愁慘戚河畔水無幾隄防有
穴隙流入魏博間高原為大澤良田百萬頃盡充魚鱉
食救之成勞費不救悲隱惻吾君為深慮不食到日昃
我忝竊寸祿素殄堪自責不負畚一土私輒逃下籍又
無一言長萬分有裨益與世同浮沈隨羣甘默默亦或
中夜思斯民苦瘦瘠四年困蝗旱五穀餌蠹賊年來風
雨時纔得一秋麥手足猶瘡痍肌膚未豐碩若待四體
肥斯民無愁色不然尋九河故道皆歷歷一勞而永逸

此成功無數或可勿復治順其性所適使民就寬肥使
水灌鄰敵試聽芻蕘言三者君自擇

寄永叔

九龍行雨歲在子皇天之命實勤止泓湫水煖皆慇飽
七龍嬉戲兩龍睡卷藏密雲空自膏畜聚甘雨不肯施
旱魃妖狂作民虐風伯暴怒興日熾訴號仰天天不聞
九州之禾皆乾瘁嗟乎龍職職行雨失職不雨民胡恃
騶虞義獸心實仁不忍斯民不食死向龍慢罵數龍罪

龍不能答滿面恥偷向上帝譏騶虞騶虞得罪龍竊喜
欲知龍與騶虞分仁與不仁而已矣

南霽雲

祿山熾亂火焚崑岡炎炎二京鞠為戰場百官奔走萬
乘愴惶孰城能守孰地不亡藉彼睢水其流湯湯有城
有民在睢之陽遠位巡上巡智我疆以巡守城巡亦克
當賊徒西來殺氣堂堂旌旗如林對城而行巡登城守
辭穀色康城中之人踴躍倍常賊知城堅坐甲裹糧城

中食盡殺愛以嘗士無二志持痛扶瘡寧守城死城不
可降霽雲勇烈跳城軼出走洒投賀求兵救乏賀飲霽
雲牢醴羅列霽雲避席謂衆人曰睢陽之人饑已一月
義不獨飽食不輒咽以刀斷指左右流血何人妨賢忌
忠嫉節心不敢分賊功害伐不勞一兵坐觀斧鉞霽雲
心折寸寸如鐵霽雲據鞍怒髮衝冠一矢以志復來不
完路人傍觀涕流如瀾遠近聞者為之辛酸力盡且窮
城孤無援至死不屈萬戈來攢精神內發顏色自安身

輕鴻毛名重泰山吾執唐刑固容於姦未誅祿山先誅
賀蘭

贈張績禹功

李唐元和間文人如蠡起李翱與李觀言雄破姦究孟
郊及張籍詩苦動天地持正不退讓子厚稱絕偉元白
雖小道爭名愈弗已卒能伯斯文昌黎韓夫子吾宗興
國來文人如櫛比黃州才專勝漢公氣全粹晦之號絕
羣平地走虎兕謂之雖駁雜亦文中騏驥白稹洎盧震

江沱自為水朱岩兼孫僅培塿對嶽峙卒能伯斯文河
東柳開氏吁嗟河東沒斯文乃屯否汨汨三十年淫哇
滿人耳粵從景祐後大儒復唱始文人如麻粒縱橫攢
戰騎徂徠山磊砢生民寔頑鄙容貌不動人心膽無有
比不度蹄涔微直欲觸鯨鯢有慕韓愈節有肩柳開志
今讀禹功文矛戟寒相倚寶光千丈高飛出破屋裏龍
音萬丈長拔出重淵底雷霆皆藏聲日星或失次我慙
年老大才力漸衰矣禹功氣奔壯今方二十二前去吾

之年猶有十四歲今讀禹功文魂魄已驚悸更加十數
年世應絕儔類卒能伯斯文吾恐不在已禹功幸勉旃
當仁勿讓爾

西北 乙亥中作

吾嘗觀天下西北險固形四夷皆臣順二鄙獨不庭吾
君仁太厚曠歲稽天刑孽芽遂滋大負固判畦町漸聞
頗驕蹇牧馬附郊坰吾恐患已深為之居靡寧堂上守
章句將軍弄娉婷不知思此否使人堪涕零

贈孫先生

世無伯樂不識馬
眼看騏驎如駕駘
先生今年四十四
才似臯夔胡為哉
泰山山水照石溪
聲濺濺白雲堆
我居其間構茅屋
好與先生歸去來

寄李縕仲淵

噫吁嘻屈原放賈誼投晦之流
子望囚古人今人皆不免
才能累身才更優
吾友仲淵少學古
胸中疎落希孔周
點毫磨墨作文傳
壯哉筆力追羣牛
三十青衫得一

尉尺澤寸波蟄長虬清廉愛民復材武一日得罪流遠
州噫吁嘻屈原忠臣楚之望賈誼少年才無儔晦之子
望具命世麒麟頭角爭崔嵬時不與兮將奈何吁嗟仲
淵勿涕流

送李先生謁張侯

先生長七尺栖栖長自吊一飲酒一石常恨酒甕小一
食牛一腔平生未嘗飽負劒出門去滿眼荒榛道行行
何所適淚下沾襟抱李生且收涕不足苦悲惱非無咸

池音夔曠世所少不識伯樂氏飛黃編牛阜我聞張侯者其人非草草六經探精微九流得指要荀況或言兵杜牧曾深考縱橫文武術難以尋常較磊磊公侯器可以鎮紛擾子將丈二矛試向伊前掉見子伊心喜扶子出泥淖王濟牛心炙李生應得咬

乙亥冬富春先生以老儒醇師居我東齋濟北張洞明遠楚宮李縕仲淵皆服道就義與介同執弟子之禮北面受其業因作百八十二

言相勉

鳳凰飛來衆鳥隨
神龍遊處羣魚嬉
先生道德如韓孟
四方學者爭奔馳
濟北張洞壯且勇
楚丘李縕少而奇
胸中磊落頗驚俗
泰山石介更過之
三人堂堂負英傑
胸中拳曲蟠蛟螭
道可服兮身可屈
北面受業尊為師
先生晨起坐堂上
口諷大易春秋辭
洪音琅琅響齒牙
鼓簧孔子興伏羲
先生居前三子後
恂恂如在汾河湄
續作六經豈必讓
焉無房杜廊廟資
吁嗟斯文敝已久

天生吾輩同扶持二子勉旃吾不肖先生大用終有時
當以斯文施天下豈徒玩書心神疲

送路遵謁孔宣公

薄田五頃餘纔足供王租慈母八十四髮白牙齒
疎服非帛不煖半冬無袴襦食非肉不飽杯案惟
一蔬南陔孝心子若何為安居方冬萬木折風裂人肌
膚凍死不敢言長途走崎嶇二百里見我寒茲求吹噓
顧我正憔悴念子空勤劬闕里有聖孫佩服詩與書孜孜

孜行仁義陰德及焦枯三縣十萬人其命絕而蘇豈使

八十老甘旨不足歟

聞宣公視殿丘奉符鄒三縣水災之民令無出今年租饑人得生

過魏東郊

全魏地千里雄大視區宇黃河為血脉太行為筋鬻地
靈育聖賢土厚含英武堂堂柳先生意氣如猛虎十三
斷賊指聞者皆震怖十七著野史才俊凌遷固三十補
二書辭深續堯禹六經皆自曉不看注與疏述作慕仲
淹文章過韓愈下唐二百年先生固獨步投篇動范杲

落筆驚王祐四方交豪傑羣公走聲譽一上中高第數
年編士伍五命為御史連出守方土事業過臯夔才能
堪相輔鳳凰世不容衆鳥競嘲訴獄中饑不死特地生
爪距貌貅十萬師盟津至北渡塞上諸猛將低頭若首
鼠渴憶海為漿饑思鰲為脯兩手擎人肝大牀橫牛肚
一飲酒一石賊來不怕懼帳下立孫吳樽前坐伊呂笑
談韜鈴間出入經綸務匈奴恨未滅獻策言可虜幽州
恨未復上書言可取好文有太宗好武有太祖先生文

武具命今竟不遇死來三十載荒草蓋墳墓四海無英雄
斯文生宗主豈子敢顛狂點戎敢慢侮我思柳先生
涕淚落如雨試過魏東郊寒鴉啼老樹丈夫肝膽喪真
儒魂魄去瓦石固無情為我亦慘沮

蜀道自勉

潮陽瘴烟黑去京路八千吏部有大功得罪斥守藩朝
衝江霧行夜枕江濤眠蛟蜃作怪變時時攀船舷魚龍
吐火焰往往出波間故為相恐怖倏忽千萬端道在安

可却處之自晏然我乏尺寸效月食二萬錢自請西南
來此行非竄遷蜀山險可升蜀道高可緣上無嵐氣熏
下無沙濤翻步覺閣道穩身履劔門安惟懷吏部節不
知蜀道難

聞子規

月上半峰峰樹碧子規啼苦月無色壯士耳邊都不聞
兒女眼中淚自滴古人出處非關身處分事親出事君
服勤至死不敢倦避勞擇逸豈所聞我看蜀道誠為難

嗟爾子規何云云王尊九折竟叱馭班超萬里圖立勲
乘危蹈險盡臣節二人至今揚清芬我本魯國一男子
少小氣志凌浮雲精神許國貫白日有心致主為華勲
位卑身賤難自達滿腹帝典與皇墳有時憤懣吐一言
小人謗議已紛紛宰相寬容天子慈八年之中三從軍
從軍官清吾何苦嘉州路遠爾勿語地不為我易其險
我豈守道不能固子規子規漫啼絕斷無情淚洒向汝

哀隣家

隣家不選醫醫無救病術朝一醫工入夕一醫工出有
加而無瘳遑遑不安室吁嗟隣翁愚予為病者恤瞽醫
一日更千人盲藥何能療沈疾

送趙澤

子來入吾圃繞食一寸苗未足充子腹饑腸猶枯焦玉
山米粒大如棗食之令人身肥饒留以待鳳凰不將食
鳴泉鳳凰一去何日回遺子一粒換肝骨

觀棋

人皆稱善奕伊我獨不能試坐觀勝敗白黑何分明運
知奇復詐用心險且傾嗟哉一枰上何足勞經營安得
百萬騎鐵甲相磨鳴西取元昊頭獻之天子庭北入匈
奴域縛戎王南行東逾滄海東射破高麗城南趨交趾
國蠻子輿櫬迎盡使四夷臣歸來告太平誰能憑文楸
兩人終日爭

贈劉中都

吾登泰山上下視何紛紛彼角而走者孰為麟與麀彼

茁而生者孰為蕭與芸伯樂不復出駕驥終同羣卞和
不再生珉玉將誰分吁哉劉中都高標凌浮雲諸侯不
薦士外府不策勲冉冉趨黃綬勤苦徒爾云我愧勢力
小不能叫吾君勿改芳蘭性林深須自薰勿隱冲鶴聲
天高當自聞

徂徠集卷二

欽定四庫全書

徂徠集卷三

宋石介撰

古詩

感事

吾嘗觀中夏地平如砥石幅員數萬里車馬通轍跡帝
宅居土中紫垣當辰極長江斷其南絕塞經其北東海
西流沙天為限夷狄三代千餘年天子雖務德寔以險
為恃四夷皆潛匿漢唐德稍衰地勝豈殊昔暫來還亟

去不敢窺城壁石晉一失謀六州淪異域天地破局鏑
山川無阻阨貽爾子孫患固知非遠策桓桓周世宗三
十纂堯歷一歲破河東劉崇喪精魄再歲復秦鳳不庭
自柔格三歲出南狩王師拯焚溺江北十四州取之如
卷席四歲征關南曾不發一鏑三州相繼降德聲揚蠻
貊李昇請臣妾錢鏐脩貢職帝欲因兵鋒乘勝務深擊
直取幽州城拓土開疆場重收虎北口復關閉寇賊是
時戰屢克六軍氣吞敵平吳如破竹成功在頃刻惜哉

志不就暴疾生中夕帝宋承大寶聲名發丕赫全蜀獻土
地舉吳上圖籍荆潭與甌閩助祭來匍匐開城納江俘
御樓受晉馘區內一正朔六州獨割剔憤憤柳宗儀才
宏包旦奭生長在河朔耳目熟金革旗鼓朝治兵酒肴
夜結客握臂說心誠倒囊堆金帛客以豪傑士遇侯頗
感激往來達厥誠生死願効力萬德納我說洞然絕嫌
隙事成已有萌侯去何云亟豪傑夜空回帳中屢嘆息
我覽此二事天意終難測撫卷一感傷兩眼淚潛滴

送張革從道謁千乘縣田秘丞京

張生何人者琅玕滿懷抱三十命未興家貧親且老出
門無所適獨守西山操饑寒屢侵凌仁義自充飽手裏
璆琳珍不屑徑寸寶足底麒麟文不踏荒榛道十月客
中寒霜風鳴浩浩張生氣愈壯勁髮上衝帽松筠凍不
折枝葉轉青好雪深徒三尺麒麟不受淖東方有賢者
開廐納駉褭臨風試一鳴應免編牛皂

送范曙赴天雄李太尉辟命

吾家泰山徂徠間濃嵐潑翠粘衣冠君來訪我茅屋下
正值山色含春寒終日把酒對山坐幾片山色落酒闌
峰頭雲好望無倦簞裏酒多傾不乾臨行再拜慇懃別
請我一言披心肝吾貧無錢以贈君門前峨峨橫兩山
願君節似南山高眼看富貴如鴻毛伯樂之廐無
駑駘豫章之才多瑰材相君新坐碧油幢之子直
上黃金臺秋風蕭蕭動笳鼓落葉撼撼鳴樽罍將軍手
持十萬騎陣前號令如疾雷從事借籌為決勝運於掌

上何恢恢蠢茲元昊命螻蟻西師堂堂難當哉况我賢相賢從事北門無憂宜大開

安道登茂材異等科

嘗言春官氏設官何齷齪屑屑取於人辭賦為程約一字競新奇四聲分清濁矯矯逸雄才動為對偶縛恢恢晁董策亦遭聲病落每歲棘籬上所得多浮薄嗟哉浮薄流不知王霸畧六經掛東壁三史束高閣瑣瑣事雕篆區區衍述作隨行登一第謂身蕭寥廓趨衆得一官

謂身縻好爵栖栖咫尺地燕雀假安託汲汲五斗米雁
鶩資飲啄壯哉張安道少懷夫子學三就禮部試不肯
露頭角恥用衆人遇羞將一戰較甘心搥翼歸豫志本

卓犖三賢文章師

大參宋公副樞蔡公使相范公連章稱薦

儒林推先覺百

鳥聲啾啾獨能辨鶩鶩驚玉石方混淆獨能識真璞薦之

於天子此材堪輪楠遂得望清光三節近帷幄僚友視

萬乘器宇誠嶽嶽願乞數刻景古今可揚榘縱橫三千

言得雋如奪稍上下馳皇王周旋騁禮樂遠推災異源

上究星文錯直言補主闕危論針民瘼天子覽其奏嘉
賞為嗟愕既嘆相見晚且言同時樂一命校秘書恩澤
優且渥追惜漢武世仲舒道磽确再念文宗朝劉蕡命
蹇剝有才無其時徒抱此誠慙吾君嗣丕基百王慙景
鑠萬物蒙休嘉四夷奉正朔賢良得其時才命不相虐
子今乃大遇君臣無隔膜我賀吾君明取士得英卓我
賀安道行逢時不蹉跎行願入廊廟鈞軸在掌握上使
斯文淳下使斯民樸五帝德可追三王豈為邈

寄復熙道

四五十年來斯文何屯蹇雅正遂凋缺浮薄競相扇在
上無宗主淫哇千萬變後生益纂組少年事雕篆仁義
近消亡聖經亦離散其徒日已多天下過大半路塞不
可聞甚於楊墨患辟之使廓如才比孟子淺患大恐不
救有時淚如霰大賢為時生去聖猶未遠昔日到汶上
熙道始相見知道在熙道一見不敢慢尊之如韓孟與
道作藩翰今春來南都明復去京輦未識心相通所懷

恨未展明復無羈縛我有守官限南走三百里訪我殊
不倦劇談露胸臆胸臆無畔岸高文見事業事業著編
簡一一皇伯畧縱橫小管晏磊磊王佐才上下包周漢
二賢信命世實為有道見天使扶斯文淳風應可變我
綴二賢末材驚愧歎段

詔下勉諸生

禮部文章淵波浪百尺高進士英俊窟蛟龍千萬條吾
子欲求濟整子棹與篙吾子欲求勝操子戈與矛勿謂

水可狎徒行思遊遨勿謂龍可馴空手揭鬚毛神波忽
洶湧怖死填蟹螯龍角忽張怒走同蝦蟇曹葑利篙楫
往跳海如溝濠葑櫟戈矛行壯蛟如猿猱吾言有所勉
非徒聲嘈嘈

感興

村居何所適種木種桑梓田園繞家舍遠不踰十里欵
段足乘騎代步而已矣但識畜鴛鴦安知有騏驥臘月
北風寒太行山色紫君命急如火城頭見烽燧雪深馬

僵倒十夫扶不起軍法有明訓後期者誅死倚鞍思駿
骨撫轡念綠駟求之不可得轂肱滿眼淚旁聞負薪叟
竊語相譏刺居安常念危在險如處易臨難始求濟狼
狽徒勞爾有備則無患古人垂深旨平居無事時華廐
深秘邃嘉穀與豐草秣飼勞廐吏驚駘飽相枕素飧不
知愧伯樂能識馬每來加勸說飛兔與騷褭日牽在都
市為愛千金資貪吝不肯置今日臨艱難努力自勉勵

又送從道

常欲飽煖天下人其道未得一寸施子有二親皆七十
糠覈不充常寒饑昨日訪我破屋下具雞一隻酒一卮
子起却盤筋不舉吾親未省曾食之對我歎噓涕泗下
孝子之心真可悲子固與我同一體相間豈復有毛皮
顧子之親則吾親吾親凍餒無奈何飽煖天下心徒
為送子出門成此詩

密真杜公作鎮於魏天章李公領使於魏明復
先生客於魏熙道宰於魏因作詩寄

古魏信名地曹劉遺英躅李唐三百年恨為干戈蹴建
安風不還南皮草空綠寥寥千餘祀風流今始續李杜
二賢公清猷鎮雅俗詩名占唐代二公本名族聖時還
並生聲烈相薰馥朝廷倚金湯天子恃心腹盛德繫物
懷威望憬夷服千里無驚烽三軍安食粟休然德化厚
蒼生坐蒙福先生服仁義懷道輕爵祿非其義不取一
簞亦自足陳蕃知人明文侯好士篤解榻延徐孺過門
識干木今留三公館德修令問淑熙道富天爵孝弟聞

鄉曲孔孟信可蹈聖賢良自勗漢庭新射策驟升校書
局魏縣方百里君命往養育三公佐世傑二賢不碌碌
相與施禮讓物歸不待宿相與講道義教化神以速賢
人時遘會間不容薄殼五百年一賢今乃同時生千里
猶比肩四賢今連甕相聚誠可樂相得良有情我愧孤
且陋徒抱此寸誠處乾比无首在泰非彙征出門皆同
人坎坎于郊行獨鶴遠無和栖栖在陰鳴安得雙飛翼
一翥鄴都城

偶作

晉公平淮西兵出速如神崇韜伐西川六十日請臣太
祖初受命諸侯未盡賓蜀廣號敵國荆潭為強隣王師
討有罪不聞過十旬元昊誠螻蟻有地長一畛詎足污
斧鉞尋當投荆榛是何逾歲月務行含貸仁豈茲將帥
間迴無晉公倫張旗發一號豈無李處耘提戈出一戰
豈無王全斌客茲井中蛙蕩漾於流津平生讀詩書胸
中貯經綸薄田四五畝甘心耕耨勤倚鉏西北望涕淚

空沾巾

詔罷縣令舉

一絃獨不調謂琴皆可廢一目獨不張謂網可皆毀易絃張其目網在琴聲備令舉或非人止當罪舉吏遂令天下不得舉廢琴毀網復何異

植萱

一人橫行武王則羞今西夷之醜抗中國而敝萬乘西夷之服升黃堂而驕諸侯尊於天子滿於九州王法不

禁四民不收植萱於階兮庶忘吾憂

贈李常李堂

王黃州禹偁張尚書詠
高夫子李相國皆漢人

顯頊宅帝丘放勲葬咸陽有虞漁雷澤三帝聲汪洋

帝丘

咸陽雷澤
皆為漢州

聖人遺風烈生民多俊良吾宗八十年賢傑

近相望黃州號辭伯兩朝專文章尚書實大臣朝廷畏

雄剛堂堂高夫子立言婉荀揚凜凜李丞相功業薺蕭

張三人名未滅相國方騰驤又生不世才李常與李堂

二子皆絕羣鳳凰摩蒼蒼一舉一萬里志氣不可量斯

文各白首寒金敲琳琅古音抱淳澹雲和與空桑豪氣
邁傳匹驍裊與飛黃千里希一賢四公乃同鄉二子復
穎耀士風實深長遙知漢水上千載留聲光

受日勉諸生

白日如奔驥少年不足恃汲汲身未立忽焉老將至子
試念及此則晝何暇乎食夜何暇乎寐

閒興

大匠構厦屋取直棄曲木如何官擇人棄直獨取曲養

苗除稂莠養民除貪垢存莠苗不碩去貪民自富

過潼關

昔帝御中原守國用三策上策以仁義天下無能敵其
次樹屏翰相維如磐石最下恃險固棄德任智力驅馬
過潼關覽古淚潛滴開元帝道明百蠻奉周歷田野富
農桑邊隅無寇賊紫宸日視朝潼關夜常關天寶君政
荒宮闢養虺蜴恩愛成怨疾腹心生毒螫朝聞發漁陽
暮已卷河北鳴鼓渡潼關矢及乘輿側重門徒爾設關

吏安所職始知資形勢不如修道德

勉師愚等

不行一千里安得為良馬不連十五城安得稱善價汝
皆有血氣非如木偶者撮髮號男兒肯甘在人下汝不
聞圖王不成猶可霸舜與吾俱人學之則舜也汝等但
勉旃前賢皆可亞

寄弟會等

吾門何所喜子衿青青多豹常志古道佩服卿與軻平

淑號能賦其氣典以和樞從吾日久道德能切磋澤也
齒最少已有亭亭柯影頗通典籍所立不么麼淳乎性
源濁今亦為清波就初學誦詩日記十板過村雖有高
下異日俱甲科會汝少俊異美若玉山禾看汝辭林中
枝條漸婆娑合亦稍純茂知不隨身炫其流雖涓涓可
導為江沱視汝磊磊淳流皆蚌螺我有堇山錫欲鑄
為太阿誠能勉就學穎利如鈇磨翹翹數子間可與相
肩摩

五月十日雨

明道二年

鞭土不見血頑石雲不蒸鞭龍不至痛六合雷不升吾君與吾相威德震八紘萬物各修職雨師獨敢寧

送李堂病歸

春風汶水溫曉日徂徠寒之子御病歸請予開一言予知去病術為子陳大端予嘗學聖人試將道比論道病非一日善醫惟孔韓賞罰絕於周孔筆誅其姦春秋十二經王道復全完佛老熾於唐韓刀斷其根原道千餘

言生民復眠食道病由有弊邪偽容其間身病由有隙
風邪來相干子欲治斯道絕弊道乃存子欲治子身杜
隙身乃安此理近古醫吾言有本原

二子以食貧困於藜藿為詩以勉之

吾世本寒賤吾身守貧約家徒立四壁無田負城郭終
歲服一衣無裝貯囊橐吾雖得一官官微月俸薄况屬
歲荒凶饑民填溝壑吾幸有寸祿不至苦殞穫隨分且
飽煖不然亦流落爾等勤初學無恥衣食惡仁義足飽

飫道德堪咀嚼二者肥爾軀不同乳與酪爾勿嫌粗糲
爾勿厭藜藿富貴自努力青雲路非邈

蜀地多山而少平田因有云

五穀無種處蜀地土田窄癡岩頑石長不休詵詵赤子
將何食

彼縣吏

嗟乎嗟乎彼縣吏剥膚椎髓民將死夏取麥兮秋取粟
咎匹紅兮杖匹紫酒臭甕兮肉爛床馬餘梁兮犬餘餼

雀腹鼠腸容幾何虎噬狼貪何無已

蝦蟇

夏雨下數尺流水滿池泓蝦蟇為得時晝夜鳴不停幾
日飽欲死腹圓如瓶罌巨吻自開闔短項或縮盈時於
土坎間突出兩眼睛是何癡形骸能吐惡音聲嗟哉爾
肉膾不中為犧牲嗟哉爾聲粗不中人情殊不自量
力更欲睥睨橫海之鱣鯨自謂天地間獨馳善鳴名萬
物聒皆聾不知鐘鼓欽欽雷霆闕闕應龍戢腦入海底

鳳凰舉翼摩青冥此時各默默以避蝦蟇鳴何時雨歇
水澤涸青臭泥中露醜形失水無能為兩脚不解行乾
渴以至死盡把枯殼填土坑

劉生病歸

泰山山前有瓊圃其中不樹蕨與薇千頭綠竹瑤實甘
百畝玉芝丹粒肥麒麟子于鳳凰飽鼓翅奮翼揚清輝
徂徠山下少耕耨蒿藜滿圃無芳菲騶虞不住鸞鳥去
日暮啁啾燕雀飛嗟哉劉生失所投不住泰山徂徠依

經年採掇不得飽正是新春癭瘠歸

明復先生
居泰山

久旱

風伯且須戢頭角放出龍喙萬丈長喙垂一尺雨一丈
得雨萬丈成豐穰

永伯仲淵在獄作此以傷之

吁嗟惡獸羣蹄踏麒麟如死磨吁嗟惡鳥噪噪鳳凰伏
中林我願爪牙如鋒鏑牙可噬爪可搏直入深山驅虎
狼護取麒麟好頭角又願身生兩羽翼一夕長就萬丈

長直入林中護鳳凰不使毛羽膚寸傷吾願兩未遂中
夜涕沾裳

送進士高拱辰


韓門有李漢柳氏得晦之其道卒無患二子為藩籬吾
才誠駑弱十年空孜孜韓閫與柳闔豈敢輒潛窺二氏
方肆行斯文日已衰手持萬丈斧欲往斷其技以次及
根柢使不復蕃滋高生吾之壻乃肯從吾為示我文一
編言辭不歲蕤翅羽雖尚短已堪摩尾箕氣力雖未全

已能搏蛟螭吾日覺老大韓柳難企斯吾子年始壯勇
若熊與羆李漢不足慕晦之當並馳

讀韓文

渺焉五帝上嘗觀二典辭煥乎三王間嘗觀二雅詩道
德既淳厚聲光何歲蕤烈烈日精散閭閻雷聲施施焉
如飛龍潛焉如蟠螭祖述兼憲章後世惟吾師永言二
帝往羣言或隳離亦既二雅末六義多凌遲寥寥千餘
年顛危誰扶持揭揭韓先生雄雄周孔姿披榛啟其途

與古相追馳沿波窮其源與道相濱涯三墳言其大十
翼暢其微先生書之辭包括無子遺春秋一王法曲禮
三千儀先生載於筆巨細成羈縻楊墨乃淪胥曠然彰
其媿佛老亦顛躋茫然復於夷婉婉平蔡畫淮西獲以
依凌凌逐繼文潮民蒙其禧將無造化合功與天地齊
洋洋治世音磊磊王化基悖之則幽厲順之則軒義



徂徠集卷三

欽定四庫全書

集部
祖徠集

卷四至六

詳校官給事中臣李臺

檢討臣何思鈞覆勘

總校官編修臣王燕緒

校對官編修臣盧遂

謄錄監生臣陶鳴珂

欽定四庫全書

祖徠集卷四

宋 石介 撰

近體詩

讀安仁學士詩

曼卿舊字安仁

齊梁無駿骨李杜得秋毫後世益纂組變風堪鬱陶奔
道少驥逸充棟如牛毛試看安仁詠秋風有怒濤

寄雷澤張從道

不知有凍死一室心恬如臘盡妻未褐天寒子讀書澆

風與世薄古道於時踈事事皆同我憶君春草初

竹書筒二首

截竹功何取為筒妙可談長猶不盈尺青若出於藍浮
薄瓢皆去嶽峯節獨堪誰言但空洞自是貴包含虛受
殊招損多藏不類貪巾箱經漫五謗牘篋空三淚有湘
妃洒書疑禹穴探質曾冒霜雪價本擅東南隕籜遺輕
粉移根破凍嵐龍吟終不死鳳實尚餘甘朴陋我為貴
雕鏤彼合慙居常置几案出或係駢驂唱和友朋倦提

攜童僕諳純姿斥丹漆美幹敵梗枏其直如周道虛心
學老聃吾徒正得用詩筆戰方酣

又

達者創奇製雙魚斷竹尋蒼琅破雲色蕭瑟移風音徑
寸不為短探幽乃覺深中間自空洞枝幹何歎蒼投恐
成龍去吹還作鳳吟稜稜人有節竅竅物無心儉朴功
難比提攜力易任純姿古皇道虛受聖人經或貯諫官
草多收女史箴筒兮用可貴吾不換南金

訪田公不過

主人何處去門外草萋萋獨犬睡不吠幽禽閒自啼老
猿偷果實稚子弄鋤犁日暮園林悄春風吹藥畦

蘇唐詢秀才晚學於予告歸以四韻勉之

憐我山中卧半年相伴吟道傳諸子後易得數爻深爨
或經年絕書猶盡日尋惜哉未終業親老忽沾襟

獵

騎士千人集綏旌四面張凝陰慘羣物殺氣結飛霜雉

守一節死兔緣三穴藏石慙羊質見狐嘆虎威亡獸困
猶思鬪鴻驚不亂行惟當縱猛鷲盡使食貪狼意務除
田害誰言事外荒非熊得呂望祝網遇成湯近念魏知
古深思夏太康吾君戒馳騁凡事合經常

大寒早行

萬動皆休迹五更獨鳴鞭星霜結淒色風霰過長川草
煖犬猶睡河冰馬不前城牆多有穴林屋半無烟餓虎
寒猶吼妖狐怪不眠山空亂猿叫樹折一雞顛幾處爐

薰炭何人坐有氊崎嶇轉行路凜冽逼窮年脚指兩箇
落衫裳百孔穿噓唏鼻纔潤僵直手難拳身固凍不死
老當窮且堅四方丈夫事誰為淚潺湲

遊虛泉山寺

寺遠離朝市同遊並結軫堦根盤石磴殿影落青冥地
勝松筠衆山名草藥靈洞門深數里檜樹壽千齡疑有
神仙聚寧容魑魅停年多養龍虎早已蟄雷霆石上生
苔蘚岩阿長伏苓晴雲出幽竇陰霧滑疎櫺露滴茶芽

潤烟蒸竹汗青
食霞充道味
採术驗丹經
直擬升高處
何妨陟絕陁
遐觀際寥廓
下視何羶腥
自被利名染
無因肺腑醒
晨興看案牘
夜坐守牕螢
齟齬遵前訓
兢兢視此銘
沉冥若籠鳥
囚係似拘囹
有願棲雲壑
相隨步翠坵
平生山野性
暫喜據梧暝

至日早離張村

北闕千官集
南山萬壽長
何人踐文石
獨客踏寒霜
指凍且憂落
馬羸時恐僵
豐山卜來歲
猶喜喬雲黃

歲晏村居

歲晏有餘糧杯盤氣味長
天寒酒腳落春近臙頭香菜
色青仍短茶芽嫩更黃
此中得深趣真不羨膏粱

病起吟殘菊

病起重陽過東籬菊尚黃
慙勤撷寒蕊仔細嗅清香
老梗防閒蝶清油護曉霜
叢邊強一酌聊不負秋光

和馬寺丞秋日寄明復先生

秋陰間秋色何處動悲涼
有叟傳岩隱明時皓鬢蒼
殘

書幾篋蠹寒菊半籬荒惟學春秋者時時到草堂

嶽色

春近滿魯甸雨餘堆汶河濃雲映不盡殘照射來多高
與天垂野間臨月上波特開西北戶愛此鬱嵯峨

宿村舍

明道癸酉歲

去去都城遠蕭蕭村落稠饑鴟啄死鹿鳴憤隨孳牛轉
徙多空屋荒榛有亂丘狐狸競恐怖雀鼠仍啁啾鬼火
時明滅旋風乍卷收吾心不吐茹忠信待姦仇

和奉符知縣馬寺丞永伯捕蝗回有作

天道不可詰吾當責爾螟方今絕讒慝何故播羶腥野
草離離盡秋禾穗穗零知君恤民意冀滅數莖青

泰山

七百里魯甸北瞻何巖巖諸山知峻極五嶽獨尊嚴
宇登來小龜蒙視覺凡此為羣物祖草木莫鋤芟

留守待制視學

藝祖興王地諸侯布教宮冠纓臨仗集文雅與時隆泮

水差差綠春芹習習風袍輝子衿動旗映講紗紅節鉞
來門外聲容播國中分庭等威殺更僕宴談終疊疊聞
諄誨拳拳激懦衷武昌尊庾亮蜀郡樂文翁王化周南
始儒縫魯俗通四方觀表則後學發童蒙木鐸留遺韻
緇衣續舊功願公持此道黃閣弼清躬

其二

演道開談席觀文降使幡水寒芹葉薄春早杏陰繁喜
動青青佩親聞疊疊言孤生荷樂育終始託丘園

其三

開府雍容甚輕裘博雅存席間閒布帙鈴下晝無喧
首喜隆儒術諸生接討論馬融南郭學齷齪豈堪言

其四

春早沂風煖芹生泮水深前旌拂講樹垂佩耀青衿
郁彌文化循循善誘心恭王不壞宅金石有遺音

其五

翼翼取則地菁菁樂育篇使轡臨學舍台席俯談筵
韋

相傳經舊文翁倡教先諸生動觀嘆門外卓卿旃

其六

泮水綠猶淺春芹葉始敷旌旗久停駐衿佩儼相趨庾
亮親臨學哀公不詬儒茲為表則地風教自王都

寄趙庶明推官

四十年來贊太平君王耳畔管簫聲定襄地域俄聞震
萊牧男兒忽議兵明日邊烽高百丈同時御府出三旌
將軍請用多多算能向當初見未萌

寄沛縣梁子高

南海怒蛟三尺角埋藏水底嘆吟呻
明時直道難干祿
白首躬耕力養親
醉讀兵韜鬪龍豹
閒抽寶劍舞星辰
官齋東是留侯廟
定有英靈還往頻

送殿院還臺

老栢森森節貫冬
頭冠獬豸號清雄
側堦簪筆書王法
當路埋輪有祖風
白簡剛嚴重
入府皂封切直舊留中
長安豪貴應相避
又識當年御史驄

徂徠山齋熟寢家童報征西府從事田集賢元
均張著作與文趙推官庶明書至開緘讀之

因題書後

滿徑蓬蒿懶自鋤何人日午叩茅廬徂徠山下一枕睡
經畧府中三紙書兵謀貴勝縱橫出海鳥忘機飲啄餘
惟有華夷雅頌作文章兼不讓當初

元均首登賢良科因寄

宏辭等甲賢良貴二美翩翩落个中

今之御試用三題
即唐宏辭科也

虎子得來山穴泣驪珠探去海濤空三千字獨陳常字

十七人甘坐下風

試者十八人

曾向當年競頭角直從此日

決雌雄

予與元均同年登進士科禮部御前姓名皆相隣

安道再登制科

雄辭磅礴壓羣英再戰戈矛銳更精裴度韜鈴無失律

武侯節制是神兵千人盡服徂共議九合誰干小白盟

帝宗開基八十載連登科目獨為榮

送奉符監酒稅孟執中借職

蜀主之後

東西兩處各天涯去國還鄉喜又嗟鄒嶧山藏孟子宅

自言孟軻後

海棠花落蜀王家深知周道非彝酒可罪唐臣

乞稅茶三載此心無一事聞經絳帳日常斜

事退日就孫明復先

生問道

嘉州讀邸報見張叔文由御史臺主簿改著作

佐郎依舊在臺

驚聞除日到遐荒病眼偏明喜倍常古節如爭臺栢直
青衫新惹閣芸香中廬夜宿羣經蠹北戶朝趨滿簡霜

主簿雖卑官漸緊近來應有諫書囊

予與元均永叔君謨同年登科永叔尋入館閣
元均今制策高第君謨後磨勵元均事業獨
予駕下因寄君謨

網羅當日得英雄文陣三人各立功海裏赤鯨疑有角
雲中騏驎欲追風尋聞館閣英聲出又見賢良大對通
亦說年來畜奇業蟪蛄何計逐飛鴻

赴任嘉州初登棧道寄題姜潛至之讀易堂

我不從官君下第其間險易兩何如連雲棧外四千里
讀易堂中一帙書慈母含飴垂禿髮先生懷道接茅廬
莫將清淚頻頻灑蜀道之難欲上初

入蜀至左綿路次水軒暫憩

水軒聊得恣吟哦拂拭衣裳塵土多蜀道三千里巖險
官途五十驛風波暫休又作故山夢閒唱還成勞者歌
幾斗米牽歸未得空憐滿眼是烟蘿

寄叔文

幾年持筆事征西未省尊前略展眉
草檄朝慵腕勞脫論兵夜苦舌瘡痍
報君自說心如石憂國人言髣欲絲
若紀成功鏤金板能文韓愈自相隨

左綿席上呈知郡王虞部

王與介前任同在睢陽

何事相逢悲喜并倏然相別二周星
主人鬢髮無多白幕府藍衫依舊青
目極同思故山斷涕洟共在異鄉零

階前絲竹雖嘈雜不似南湖湖上聽

睢陽南湖宴游之所也

嘉州寄左綿王虞部

江山如畫望無窮
况屬昇平歲
屢豐萬樹芙蓉
秋色裏
千家砧杵月明中
斷霞半著燕支木
零露偏留筍竹叢
只欠流杯曲水宴
風流未與左綿同

左綿新
創流杯

士廷評相會梓州

道視荀揚雖未至
分於管鮑已知深
一千二百日離別
五十六驛外相尋
重欲同君注周易
且來共我聽胡琴
月留屋角不下去
似與清風憐苦吟

鄭師易秀才詩奔騰道壯殆有石曼卿學士風

骨作四韻以勉之

曼卿續得少陵絃絃絕年來又一年驚起聽君諷新句
洒如開集味遺篇一家氣骨疑無偶萬丈光芒欲拂天
好向風騷尤著意他時三箇地詩仙

送李堂伯升病歸

經年玄圃採珠璣無限愁腸對落暉綠竹實疎鳳凰瘦
玉芝粒小麒麟饑不因勞草傷春哭正是飄蓬感疾歸
只有文章滿君腹身雖癯瘠道全肥

伯升病歸君逢遵道送歸

朝來何事苦顰眉一客越吟三子歸
河渚徘徊感春草山齋寂寞背斜暉
知心古道誰相得洒淚東風自覺非
早到茅廬慰孤淡易文重待共參微

喜雨

學作昇平喜雨吟東臯微破滿犁深
已聞萬乘焦勞慮應解三公變理心
天捉乖龍鞭見血雷驅和氣泄為霖
農夫隴上閒論價一寸甘膏一寸金

留題敏夫隱居

三迴到此尋逋客
杯案蕭疎氣味長
午飯半甌橡子熟
春蔬一筋米苗香
四時泉石應無夏
滿谷雲霞別是鄉
終待共君結隣里
竹邊相並兩間房

訪竹溪呈孟節兼有懷熙道

到頭泉石是吾家
坐石聽泉日已斜
一片青衫非富貴
千竿綠竹好生涯
君曾覽照頭皆雪
我試看書眼亦花
便好結為山伴侶
教他夔益佐勲華

招張洞明道

君言下第我西飛
執手都門淚滿衣
萬里得歸頭半白
經年相別道應肥
火鑽欲遍龜難死
竹實猶多鳳不饑
輒到東山慰愁抱
春秋之學說深微

攝相

惜無百里地封君
攝相區區道屢伸
少正將身膏斧刃
侏儒流血汙車輪
方令魯國知王法
自此齊侯畏聖人
昔放四凶誅二叔
舜周功業始同倫

寄孔中丞

諫署崢嶸有舊名
侯藩偃息政方成
張綱昨日彈梁冀
文帝今朝召賈生
古節未慙臺柏直
仙風應對簡霜清
人言賤子叨知己
試把塵冠一振纓

送弟及之就彭門侍養

城南車騎曉駸駸
欲去重留酒屢斟
惜爾浪浪辭我淚
感予切切戀親心
庭闈最樂無妨學
風月餘閒豈廢吟
別後不憂書信少
但聞為善是佳音

村居

幽居一卧枕溪稜
堦下杉松纏古藤
常愛園林深似隱
不嫌門戶冷如僧
麥宜過社猶催種
山近經秋却懶登
已把壯心閒頓置
少年莫要苦相憎

燕支板浣花牋寄合州徐文職方

合州太守鬢將絲
聞說歡情尚不衰
板與歌娘拍新調
牋供狎客寫芳辭
木成文理差差動
花映溪光瑟瑟奇
名得只從嘉郡樹
燕支木
嘉州出
樣成仍自薛濤時
有薛
濤牋
奇章

磊磊馳聲價江令翩翩落酒卮幾首詩成卷魚子

有魚子戲

誰人唱罷泣燕支紅牙管好同牀置紫竹笙宜一處施

直助風流向樽席杏花況是未離披

司空圖有杏花辭文頃在睢陽多命

唱之

御史臺牒督光臺錢牒云以憑石柱鐫名因戲

書呈通判寺丞景元

幕中久次無他術銜內兼官帶憲司石柱鐫名誠似是
勇冠加首竟何為幾曾執簡抨彈去空被光臺督責隨

一起鴛鴦夏雲漢應嗤燕雀守藩籬

送馮司理之任彭州

李白詩中蜀道難把詩試讀淚汎瀾江形詰曲千回折
岑路峻增萬屈盤登陟去年腰欲折追思今日鼻猶酸

予去年罷
嘉州歸

此行君不同屯蹇五馬相知舊長官

彭牧與
君常同

官

赴任嘉州待闕左綿七十日通判呂國博日相

從吟酌至嘉陽因成四韻寄之

鼎來豈敢道能詩一見何因便解頤鄉國三千里離別
杯盤七十日相知送人江外馬駝妓垂釣寺中魚竭池
別後中秋又重九與誰賞月詠東籬

顏魯公太師

唐家六世樹威恩外建藩翰禦不賓二十三州同陷賊
平原猶有一忠臣

又

聖賢道在唯顏子忠烈名存獨杲卿甘向賊庭守節死

不羞吾祖與吾兄

褚遂良僕射

先皇執手未多時受託誠深誓不違終向君前還此笏
一身視死喜如歸

陽城諫議

衆口喑喑血噤牙獨將忠蹇敵姦邪德宗若用延齡相
敢有陽城壞白麻

袁高給事

擲毫不肯草絲綸宰相遂巡命別人明日執回盧杞制
始知唐室有忠臣

溫造御史

一言膽落折藩臣倔強何人敢恃勲闕下惟聞溫御史
蔡州自是李將軍

劉栖楚拾遺

此節寧甘剛則折平生不肯曲如鉤革囊裹血將何用
一汗龍墀死即休

讀五王傳

聖賢用策寧相遠千載毫釐竟不差四皓當年安漢嗣
五王今日復唐家

讀晉魯二公傳

節似魯公猶被陷忠如裴度亦遭讒上無明主姦邪勝
我讀遺編淚滿衫

李英公勸

一言容易廢忠謀徇主從昏可自尤今日始知孤負託

當時齧指血空流

漢成帝

鬱鬱朱雲志不伸上方寶劍欲生塵空留折檻旌忠直
左右何嘗去佞臣

文中子

龍蟄河汾道不行訐謨經濟授諸生由來房魏皆卿相
共輔文皇致太平

又

獨將禮樂付程仇
房杜無才闡大猷
可惜唐家三百載
聲明文物愧宗周

初過潼關值雨

二十年來憶華山
揚鞭西笑入秦川
浮雲何苦深遮閉
豈是三峰不好賢

雨晴賦一絕

過關何事懶搖鞭
酷愛三峰落馬前
天氣清明新雨後
山光日色滿秦川

過溫湯

驪山山水洋洋一勺之多解破唐敢告後人商鑑近
溫湯今日是唐湯

初過大散關馬上作

奈何山色牽吟思旋被江聲破睡魔吟思睡魔兩相戰
誰知馬上有干戈

過飛仙嶺二首

入蜀牽吟景象濃雲山萬疊與千重癡岩頑壑無奇觀

不似飛仙數朶峰

又

御愛數峰非拔秀當時駐蹕欲忘還飛仙急過無真賞
始信明皇不識山

峽中

路狹纔容飛鳥過山將生合奈山何不知天外山長短
何事窺來一管多

劍門讀賈公疎詩石

劍門駐馬立踟躕讀盡新篇味有餘
關令多情兼好事
詩名留得賈公疎

予自南京留守推官循資為掌書記由將仕郎
超階至朝奉郎得蜀嘉州友人相賀者因答之
一循資走五千里四遇恩超十六階自顧非才已過分
誰言英俊尚沉埋

蜀道中念親有作

東望庭幃魂欲銷
層層雲棧上嵒堯
江聲山色情多少

相伴西來慰寂寥

泥溪驛中作

嘉陵江自大散與予相伴二十餘程至泥溪背予去因有是作

山驛蕭條酒倦傾
嘉陵相背去無情
臨流不忍輕相別
吟聽潺湲坐到明

柳池驛中作

二十二餘程鳥道
一千一百里江聲
聽盡行盡不覺遠

西去出山猶七程

至羅江出山

訪栗園有感

遊困歸來訪栗園栗園樹老再生孫莫驚頭上見白髮
拾栗兒童長幾番

離鄆州至壽張南邨舍中有老姥八十餘出拜
老姥龍鍾八十三猶能指點認青衫自言老婦嘗蒙忠
白首相將出戶參

徂徠集卷四

欽定四庫全書

徂徠集卷五

宋 石介 撰

雜文

怪說上

三才位焉各有常道反厥常道則謂之怪矣夫三光代明
四時代經天之常道也日月為薄蝕五星為彗孛可怪也
夫五嶽安焉四瀆流焉地之常道也山為之崩川為之竭
可怪也夫君南面臣北面君臣之道也父坐子立父子之

道也而臣抗於君子敵於父可怪也夫中國聖人之所常治也四民之所常居也衣冠之所常聚也而髡髮左衽不士不農不工不商為夷者半中國可怪也夫中國道德之所治也禮樂之所施也五常之所被也而汗漫不經之教行焉妖誕幻惑之說滿焉可怪也夫天子七廟諸侯五廟大夫三廟庶人祭於寢所以不忘孝也而忘而祖廢而祭去事遠裔之鬼可怪也夫法施於民則祀之以死勤事則祀之以勞定國則祀之能禦大菑則祀之能捍大患則祀之棄

殖百穀祀以為稷后土能平九州祀以為社帝嚳堯舜禹湯
文武有功烈於民者及夫日月星辰民所瞻仰也山林川
谷丘陵民所取財也非此族也不在祀典而老觀佛寺偏
滿天下可怪也人君見一日蝕一星縮一風雨不調順一草
木不生殖則能知其為天地之怪也乃避寢減膳徹樂恐
懼責已修德以禳除焉彼其滅君臣之道絕父子之親棄
道德悖禮樂裂五常遷四民之常居毀中國之衣冠去祖
宗而祀遠裔汗漫不經之教行妖誕幻惑之說滿則反不

知其為怪既不能禳除之人崇奉焉時又見一狐媚一鵲
噪一梟鳴一雉入則能知其為人之怪也乃啟咒祈祭以
厭勝焉彼其孫其子其父其母忘而祖宗去而父母離而
常業裂而常服習夷教祀夷鬼則反不知其怪既厭勝之又
尊異焉愈可怪也甚矣中國之多怪也不為怪者幾少矣噫
一日蝕一星縮則天為之不明一山崩一川竭則地為之不
寧釋老之為怪也千有餘年矣中國蠹壞亦千有餘年矣不
知更千餘年釋老之為怪也如何中國之蠹壞也如何堯舜

禹湯文武周公孔子不生吁

怪說中

或曰天下不謂之怪子謂之怪今有子不謂怪而天下謂之怪請為子而言之可乎曰奚其為怪也昔楊翰林欲以文章為宗於天下憂天下未盡信已之道於是盲天下人目聾天下人耳使天下目盲不見周公孔子孟軻揚雄文中子吏部之道使天下耳聾不聞有周公孔子孟軻揚雄文中子吏部之道周公孔子孟軻揚雄

文中子吏部之道堯舜禹湯文武之道也三才九疇五
常之道也反厥常則為怪矣夫書則有堯舜典皋陶益稷
謨禹貢箕子之洪範詩則有大小雅周頌商頌春秋則
有聖人之經易則有文王之繇周公之爻夫子之十翼
今楊億窮研極態綴風月弄花草淫巧侈麗浮華纂組
剗鏤聖人之經破碎聖人之言離析聖人之意蠹傷聖
人之道使天下不為書之典謨禹貢洪範詩之雅頌春
秋之經易之繇十翼而為楊億之窮研極態綴風月弄

花草淫巧侈麗浮華纂組其為怪大矣是人欲去其怪而就於無怪今天下反謂之怪而怪之嗚呼

怪說下

吾既作怪說二篇或曰子之怪說上篇言佛老下篇言楊億佛老楊億信怪矣然今舉中國而從佛老舉天下而學楊億之徒亦云衆矣雖子之說長又豈能果勝乎子不唯不能勝萬億千人之衆以萬億千人之衆反攻子且恐子不得自脫將走於蠻夷險僻深山中而不知

避也子亦誠自取禍矣余聞之輒躍起身數尺瞋目變色應之曰孔子大聖人也手取唐虞禹湯文王武王周公之道定以為經垂於萬世矣堯舜禹湯文王武王周公之道萬世常行不可易之道也佛老以妖妄怪誕之教壞亂之楊億以淫巧浮偽之言破碎之吾以攻乎壞亂破碎我聖人之道者吾非攻佛老與楊億也吾學聖人之道有攻我聖人之道者吾不可不反攻彼也盜入主人家奴尚為主人挾戈持弓以逐盜反為盜所擊而

至於死且不避其人誠非有利主人也蓋事主人之道不得不爾也亦云忠於主而已矣不知其他也吾亦有死而已雖萬億千人之衆又安能懼我也

原亂

周秦而下亂世紛紛何為而然也原其故蓋有由矣由亂古之制也夫天子君也諸侯臣也君南面臣北面上下之制也故天子負斧宸南嚮而立朝諸侯於明堂明堂者明諸侯之尊卑也明諸侯之尊卑者明君不可降

於臣臣不可擬於君也周至夷王王室弱矣不敢自尊
於諸侯與諸侯下堂而相見則君臣之禮夷王亂之也
君臣之禮亂則朝覲之禮廢而諸侯不臣矣天下無王
矣吁亂是以作古者什一而稅故夏五十而貢商七十
而助周百畝而徹蓋什一者天下之中正也周室寢微
王道絕矣諸侯專征伐擅賦役兵革不息興作無時而
用度窘魯先公於是始稅履畝成公於是始作丘甲則
什一之制宣公成公亡之也什一之制亡則聚斂之名

起而國日以削矣民日以貧矣吁亂是以作古者為井
田一夫一婦受田百畝公田二十畝廬舍二畝半凡為
田一頃二畝半八家而九頃共為一井田有定分賦有
常出而民無爭秦孝公專務富國彊兵用商鞅計廢井
田制阡陌任其所耕不限多少則井田之制秦孝公廢
之也井田之制廢而經界不正井地不均穀祿不平矣
吁亂是以作夫男正位乎外女正位乎內天子聽男教
后聽女教天子理陽道后理陰道天子聽外治后聽內

治三代不易之道也秦襄王太后出閨闥而臨軒戶以
女子而朝羣臣則陰陽之序男女之職秦太后亂之也
男女之職亂則陰陽之序失陰陽之序失則日月逆行
而天地反覆矣吁亂是以作古者封建諸侯藩屏王室
天下治與諸侯守之天下亂與諸侯持之三代享國或
八九百年或四五百年由茲道也秦始皇既吞六國并
諸侯思欲獨立天下乃改封建置郡縣則封建之制秦
始皇壞之也封建之制壞而天下微矣王室弱矣天子

孤矣吁亂是以作古者一后三夫人九嬪二十七世婦
八十一御妻后妃之數也秦漢帝母稱皇太后祖母稱
太皇太后適稱皇后妾皆稱夫人外又有美人良人八
子七子長使少使婕妤姬娥容華充衣昭儀之號凡一
十五等則后妃之數秦漢亂之也后妃之數亂則品秩
雜而女色盛品秩雜則上下瀆矣女色盛則邦國殆矣
吁亂是以作周禮閹者掌守王宮中門之禁而已寺人
掌王宮之內人及女宮之戒命而已漢武帝數宴後庭

或潛遊離館奏請機事多以宦官主之宦官始預政焉則宦官之權武帝啟之也宦官之權啟則巧邪入而佞倖進巧邪入則正人廢矣佞倖進則君政敗矣吁亂是以作夫君臣之禮廢則僭奪篡弑作矣什一之制亡則暴賦重斂行矣井田之制廢則豪強兼并興矣噫甚矣不封建也陳涉一倡而羸秦亡亂男女也呂后專制而炎漢中否暱后妃也戚姬進倖而太子縶危飛燕耽寵而成帝致天用宦官也恭顯用事而前朝大損曹張執

政而劉氏終滅嗚呼秦漢而下敗亂繼踵皆由是也夫古聖人爲之制所以治天下垂萬世也而不可易易則亂矣後世不能由之而又易之以非制有不亂乎夫亂如是何爲則可止也曰不反其始其亂不止

明禁

國家之禁疎密不得其中矣今山澤江海皆有禁鹽鐵酒茗皆有禁布綿絲枲皆有禁關市河梁皆有禁民去其君則不禁男去耒耜則不禁女去織紵則不禁工作

奇巧則不禁商通珠貝則不禁士無仁義則不禁
淫文害正則不禁市有游手則不禁官有游食則
不禁衣服踰制則不禁宮室過度則不禁豪強兼
并則不禁權要橫暴則不禁賄行於上則不禁吏
貪於下則不禁夫民去其君則叛也男去耒耜女
去織紵則離其業也工作奇巧商通珠貝士無仁
義則棄其本也淫文害正則經籍息也市有游手
官有游食則公私墮也衣服踰制宮室過度則上

下僭也豪強兼并權要橫暴則善人困也賄行於上吏貪於下則公道缺也如是不禁彼山澤江海人所取財也鹽鐵酒茗人所取資也布綿絲枲人所取用也關市河梁人所取濟也而禁豈先王之法乎三代之制乎哉或曰如何則先王之法也三代之制也曰禁其不禁而弛其禁則先王之法也三代之制也

但來集卷五